



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

42. Kalenderwoche – ab 17. Oktober 2010

Schlissl im Mill

Eens is gomisch - immor wenn meine Gudste nisch daheeme is, da dun mir Sachn bassiern, die mir sonsd nisch bassiern. Zum Beischbiel vorsche Woche. Vorsche Woche is meine Gudste nähmlisch widdorma fiehr zwee Daache bei ihror Muddor gewähsn. Was meine Schwieschormuddor is. Da mussde isch also ganz alleene fiehr misch sorschn un alles erledischn, was ehm so zu erledischn war. Ooch Mill wegbring mussde erledischd wern. Das is ooch keene sähr schwierische Erledischung. Normalerweise!

Dor Millgonddeehnor schdehd bei uns in so eenor Egge mid ringsrum Bische un Heggn. Also middn im Grienen. Dähn Millbeidl hadsch in dor reschdn Hand. Unnor dem annorn Arm haddsch noch baar alde Zeidung geglemmd, fiehrn Babiergonddeehnor, un dann haddsch ooch noch zwee Schdoffdaschn mid leere Flaschn drinne, die zum Glasgonddeehnor solldn. Jednfalls war isch ganz scheen bebaggd.

Dähn Wohnungsschlissl haddsch in dähr Hand, wo dor Millbeidl war. Am Millbladz ham misch dann zwee äldore Damen ausm Haus in e Geschbräsch vorwiggld, ob isch ooch vorsche Nachd keen Schdrom gehabbd ham däde. Abor isch hadde geschlafn un wussde nisch, ob isch Schdrom hadde odor nisch. Während isch das dähn zwee Dam vorsuchd hab, zu erleidorn, habsch mid dor reschdn Hand vorsuchd, dähn Deggl vom Millgonddeehner offzuschiem... - un dann schnell dähn Millbeidl neinschleidorn! Zweema is dähr Deggl schnellor widdor zugegang, als wie isch schleidorn konnde. Isch hädde missn mid dor annorn Hand dähn Deggl feshaldn, abor irschendwie warsch ehm ooch durch die zwee Dam abgelengd. Beim driddn Versuch is mirs dann doch gelund, dähn Millbeidl neinzuschleidorn, bevor dor Deggl widdor zuge flubbd is. Dann zum Babiergonddeehnor, dann zum

Glasgondeehnor un dann wolldsch widdor noff in meine Wohnung. Un da is bledzlich dähr Schlissl weg gewähsn! Meine Gudste nisch daheeme! Isch wussde abor ganz genau, dass isch dähn Schlissl in dor Hand mid dähm Millbeidl hadde. Un da is mir ooch soford de Erkenndnis gekomm, dass isch dähn Schlissl midsamsd dähm Millbeidl in dähn Millgondeehnor neingeschleidord hadde. Isch also hin zum Millgondeehnor. Deggl off, abor erschdens habsch dähn Schlissl nisch gesähn un zweedens binsch midm Arm ooch nisch bis nunnor gekomm, um dähn Schlissl zwischn de Millbeidl offzuschdöborn. Isch mussde neingleddorn. Been hoch, dann Bauchwälzor in dähn Gondeehnor nein. Baudz lach isch drinne un dor Deggl ging zu. Isch bin zwahr weisch gefalln off die ganzn Millbeidl, abor schdoggfinsdor wars! Nu habsch vorsuchd dähn Deggl von Inne zuriggzuchiem. Beim zweedn Versuch gings dann ganz leischd, weil von draußn jemand midgeholfn hadde. E Nachbar ausm Nachbarhaus wolde sein Millbeidl neinschmeißn. Wo dähr misch gesähn had, is dähr vor Schregg riggwärds umgegibbd. Greidebleisch saß dähr zwischen de Bische.

Dähn Schlissl habsch dann gefundn, meine Glamoddn ham geschdunkn wie eene ganze Milldebonie, abor dor Nachbar mussde mid dor schnelln medizinischn Hilfe weggebrachd wern. Un bloß, weil meine Gudste bei dor Schwieschormuddor war!

Eduard Sachsenmeyer